

# BUNJEVAČKO ŽACKALO

CINA

2

DINARA

JEDINI PRAVI BUNJEVAČKI LIST

Žacka dvaput misečno

Subotica, 7 ožujka 1940

## Dragi čitaoci!

Bunjevačko Žackalo je najozbiljniji šaljivi list na svitu. Moglo bi se jednostavno reći da i nije šaljivi list. Jer ako je Bunjevačko Žackalo šaljivi list, šta su onda Naše Slovo, Neven i Bunjevačke novine? Razlika je između nas i njih u tome, što oni tvrde da su ozbiljni listovi, a niko ih ne uzima ozbiljno, dok mi priznajemo da smo šaljivi list, a ipak nas svaki uzima ozbiljno. Naš cilj je da služimo bunjevštini, ali ne onoj kojoj služe spomenuti organi, već pravoj bunjevštini. Mi pod imenom Bunjevac ne podrazumijevamo pripadnika četvrte nepostojeće narodnosti, već uže obilježje za one naše sunarodnike, koje je sudbina odredila za to da budu ovdje na sjeveru čuvari i pridstraža svoga roda. Mi nismo „organ nezavisnih Bunjevaca“, koji ovisi i te kako od svakog režima, već smo najzavisniji organ Bunjevaca, jer zavisimo od raspoloženja Bunjevaca. Toj zavisnosti se rado pokoravamo, jer služiti svome rodu je najveća čast, pa ma to bilo i u obliku šale.

## Da vidimo kako zapravo i izgleda, saradnja raznih frakcija pod gradskim tornjem?

EVO ODPRILIKE OVAKO:

Dva pijana čovika obuhvatili su jedan drugog oko pojasa, te okrenuti jedan drugom lice u lice stoje na srid ulice u stavu kao da se trljaju. Prodje tuda jedan šegrt i, misleći da se ova dvojica trljaju, prišapne jednom od njih:

— Ako hoćete da ga oborite, a vi mu podmetnite nogu.

Ovaj oslovljeni pogleda mrko šegrta i dreknu na njega:

— Marš odavle, derane! Ne vidiš da se mi ne trljamo već podupiremo jedan drugog!

**Bunjevci-Hrvati imaju dva sinatora, obadvojica potpomažu vladu, dakle nisu u opoziciji, a ipak je sva vlast u rukama onih drugih, koji nemaju ni jednog sinatora. Kako je to moguće?**

EVO OVAKO:

Bać Stipe je imao dva sina, koji su se — pošto nisu bili ni za šta drugo — dali na politiku i tu su napravili karijeru. Jednom prilikom reče bać Stipe svom komšiji Paji:

— Kada vidim ove moje sinove kako politiziraju, uvijek mi padaju na um sijamski blizanci

— Zašto baš sijamski blizanci? — upada mu u rič Pajo. — Oni nisu bili nikad političari!

— A misliš, možda, da moji sinovi jesu?

## Separatistički pokret medju Bunjevcima

U zadnje vrime osića se medju Bunjevcima jak separatistički pokret, koji teži za tim da bunjevački narod razdvoji. Tako se medju Kerčanima pojavio pokret da se odcipe od Bunjevaca i da stvore petu narodnost — kersku. Sličan se pokret pojavio i medju Gaćanima, pa i Bajnaćanima. Bajnaćani već i imaju svoga vodju u osobi Lojzije Bukve. Bać Lojzija je izjavio da, kad već ne može da bude purgermajstor ko što je bio bać Marko, bar će biti vodja Bajnaćana, koji su svi listom za njega.

Bunjevačko Žackalo apeluje na bać Marka i Ivana L. Poljakovića kao na vodje bunjevačkog naroda da spriče cipanje bunjevačkog naroda i stvaranje još nekoliko narodnosti u Jugoslaviji. Ujedno moli Dr. Ivana L. Poljakovića da o tome pitanju napiše nekoliko članaka u Danu, naravno ćirilicom i ekavski kako bi ga svi Bunjevci mogli čitati i razumjeti.

## Priposlate izjave za koje Bunjevačko Žackalo ne prima odgovornost. Izjave štampane onako kako su priposlate

Nisam znao, ali me prijatno iznenadije kao ubedjenog Hrvata, da je naš prijatelj i rotarijanac g. Pavle Grabovac jedan od odlučnih i snažnih pobornika naše Hrvatske misli.

Dr. Marko Djenero

Kada sam bio u stanju da rešavam najkomplicovanije probleme iz oblasti rotarijanstva, zašto ne bi bio sposoban da rešavam i političke probleme Subotice u vezi sa advokatskim udruženjem, pogotovo kada sam „javno priznat“ kao spoljno politički stručnjak.

Pavle Grabovac

Priča se u otmenim subotičkim krugovima da naš sugradjanin g. Branko Pakaški advokat i gradski većnik liči na g. Tituleska. Njegovo prisustvo sa sjajnim besedama u gradskom veću i nas je u ovo ubedilo.

Šaca Gavanski

Kažu, da medju nama Crnogorcima nema plemića. Ja to odlučno odbijam.

Miraš od Pipera

Ko bi smeo tvrditi da g. Dr. Subotić Strahinja nije mudrac u filosofiji jugoslovenske politike.

Prvo zemljoradničko veće u Subotici

Joso, da li ti rekoše šta u Beogradu za one 4000 dinara što finansiramo „Bunjevačko veće“?

Dr. Kendjelac

E moj brat Milivoje izgleda mi da su propale, jer Milanče ode, a Gile pasivnu ostavinu neće da primi.

Dr. Joso

Da ne beše prokletih „statuta“ može biti da bi neki od nas još ranije postao senator.

Dr. Kendjelac

Znaš Milivoje i meni upadljivo obećavaju senatorstvo, ali eto nikako ne mogu da dodjem na red.

Tvoj Aleksa

Dao sam izjavu i odlučno sam odbio da ostanem potpredsednik u režimu Dr. Joce Čovića

„Moca“

Da ne beše prijateljstva sa našim sestrama Bunjevkama, nikad ne bih postao primarijus u Subotici.

Dr. Boško, brat Srbin iz Banja Luke

### VANJSKA POLITIKA

#### Da vidimo kako zapravo i izgleda ta pomoć, koju saveznici pružaju Finskoj:

Ivici savituje njegova mamica da svaki dan triba da čini kakvo dobro dilo. Jednog dana dotrči kući Ivica bez daha.

— Šta si učinio? — pita ga mamica.

— Stari bać Joso krenuo je na stanicu, ali se pobojao da će zadocniti na voz. Nato sam ja pustio našeg garova i . . . bać Joso je odista na vrime stigao da uhvati voz.

#### BERLIN

Kako novine javljaju u Nemačkoj se od krompira proizvadjaju boje, alkohol, čokolada i pivo. Mnogi su ovu vist čitali sa čudjenjem.


#### Englezi su pripravnici da naredima koji su u opasnosti pruže pomoć. Ali kako? Ene ovako

Ivan je zgodan čovik. Uvijek je spreman da drugog tješi. Kad čuje da je neko slomio livu ruku, odmah reče: „Neka se raduje što nije desnu!“ Ako je ko slomio nogu, tad reče: „Neka se raduje što nije slomio vrat!“

Čuvši da mu je komšija Stipan prilikom jednog sudara vozova zaglavio, već je gotov da tješi udovicu: „Hvala Bogu što se nije dugo mučio!“

Medjutim naš Subotičane ova vist nije nimalo začudila, jer kod nas se već odavno od vode pravi vino i mliko, a osim toga mnogi često prave od buve slona. Prema tome Nijemci prema nama nisu ništa.

## RAZGOVOR U PUČKOJ KASINI



— JESI LI ČUO DA JE OPET POSKUPIO BENZIN?

— NEMAŠ LI, MOŽDA, AUTOMOBIL KADA TE TOLIKO NERVIRA?

— NE, NEGO KUPIO SAM NOV UPALJAČ.

★

## Kazalište

Kazališni dobrovoljci iz Subotice obratili su se Ministarstvu poljodilstva s molbom da se i njima dodile dobrovoljačke parcele. Ministarstvo poljodilstva, nakon što je svestrano proučilo predmet, odgovorilo je našim vrlim kazališnim dobrovoljcima da će ih, umjesto da im dodili parcele, parcelisati na paramparčad, ako se još jedanput ogriše o kazališnu umitnost kao što su to već učinili prilikom izvodjenja „Pastorka“.

★

## RAZGOVOR NA ŠANDORSKOM TRAMVAJU

Jednog Švabu iz Šandora upita kondukter šandorskog tramvaja:

— Je li istina da se švabe opamete tek kada navršše 40 godina života?

— Možda je i tako, odvrati ravnodušno Švabo.

— A šta rade, ako se ne opamete ni nakon toga? — opet će kondukter.

— Onda postanu tramvajski kondukteri, — glasio je kratak odgovor.

★

## Već i Dan napada Hrvatski narod

Dan je citirao članak Naplo-a, kojim ovaj napada Budakov list „Hrvatski Narod.“

Ne misle li gospoda oko Dana da bi bolje bilo da su obratno postupili, jer . . . opet . . . kakvi smo, takvi smo, naši smo. Bolji je i Naplo nego Hrvatski Narod?

## Razgovori bać Bele Stantića-Tate

### Polagacko vođeni na dugački rate

— Hvaljen Isus, Tata!

— Amen uvik, sinko!

— Šta radite?

— Pa eto, kako da ti kažem, idjem, al' ako baš očeš da ti istinu kažem, jel sam čovik, koji voli istinu i pravdu, ni ne idjem toliko, ko što bi se lipše kazalo na gospocki način, šetam polagacko s noge na nogu, sad livu sad desnu, jel sadanekarce šta drugo da radim. Eto, tako lipo šetam se pišice. Kad sam još bio mladji čovčuljak, onako prija četrdeset i nekoliko godina, ondanekecarce nisam, ko sadanekar, šeto, već sam ondanekecar više išo, jel između idjišta i šetanja je, dragi moj golube, kako da ti sad najedared friško bez natezanja da kažem, dakle da ne odugovlačim, jel znam da se žuriš i nemaš kada da se tutekarce samnom šetaš, dakle sedanekar da ti već kažem između šetanja i idjišta je zdravo velika razlika. Kako da ti i kažem, čovik dok je mladji, ko što sam kadgod i ja bio, ti to istina Bog, ne pamtiš, al ima ko i to pamti, dakle, da ti već počmem, jel i ja još imam danas tušta posla, između šetnje i idjišta je ondanekecarce velika razlika. To ti je ko na primer, kako da ti kažem . . . Imo sam ja jednog kuma. Tog ti nisi poznavao, jel je umro onako odprilike prija 30 godina, pamtim ko da je juče bilo baš onako prid berbu. Taj mi je još dok je bio živ u ono staro lipo vrime često reko: „E, moj kume, da si ti poznavao mog didu Pilipa! Siroma davno je umro, al bio je čovik, da mu u ono vrime para nije bilo! Moj dida Pilip uvik mi je govorio: Sine, šteta što nije živ moj pretelj Pajo, jel sadanekar da je on živ sve bi bilo . . .“

— Ama, Tata, počeli ste da pričate o šetnji i hodanju, pa šta je razlika . . .

— Samo polagacko, sinko, na sve će doć red, samo još malko treba da se strpiš, jel sve to ovamo spada. Dakle, kaže mom kumu njegov dida Pilip . . .

— Oprostite, Tata, žurim. Drugiput ćete mi završiti, a sad, zbogom.

— Zbogom . . .

(Nastaviće se)

## MALO ETNOGRAFIJE

**BUNJEVCI**

Najinteresantniji elemenat na kugli zemaljskoj. Sami Bunjevci nikada se nisu vezali za ovo ime. To ime su im drugi naturivali. Rekli su im: „Vi ste Bunjevci!“

Bunjevci: „Ali mi ne želimo biti Bunjevci, imamo mi naše pošteno ime.“ Oni drugi: „Ne! Vi ste Bunjevci i ostaćete to!“

To je isto kao kad bi, recimo, onim Bunjevcima, koji kažu da su samo Bunjevci, a uvijek su u vladinoj partiji neko rekao: „Vi niste Bunjevci, već Srbi!“

Dakle Bunjevci su po shvatanju drugih, narod, dok oni sami tvrde da nisu to. Bunjevci se zadovoljavaju time da budu ogranak drugog naroda, dok drugi, kojima to ne ide u tek, tvrde da su samostalni narod. To je kao kad gostioničar hvali gosta da je lip i pametan, dok se ne opije, a posli ga izbacuje iz mijane. A ovaj sutradan kada se otrizne uvidja da bi

bolje bilo da je ostao ružan i manje pametan, ali da je ostao trizan i da nije slušao birtaša.

Karakteristično je za Bunjevce, što oni Bunjevci, koji kažu da su samo Bunjevci, nisu pravi Bunjevci. Jer da bi ko mogao postati Bunjevac, taj treba da je u prvom redu Slaven, a da bi ko mogao postati Slaven, taj treba da je, recimo, ili Srbin, ili Slovenac, ili Bugarin, ili Hrvat i td. Ko to nije taj nije ni Slaven. Ali pošto Bunjevac, koji je samo Bunjevac, nije postao od ovih naprid citiranih, to ne može da bude ni pravi Slaven, a ko nije Slaven, taj ne može da bude ni Bunjevac, već opet samo Egyebek, što je i bio. Dok onaj Bunjevac, koji je, recimo, Hrvat, taj je pravi Slaven.

Dakle, pravi Bunjevac nije Bunjevac, a Bunjevac nije pravi Bunjevac.

Bunjevac

**Životni prostor**

U zadnje vrime mnogo se govori o životnom prostoru. Da vidimo kome šta služi za životni prostor:

Marku Juriću i drugovima — Gradska Kuća; Djidi — hodnik u Gradskoj Kući; Vladi Milovanovu — stol kraj prozora u kafani „Jagnje“; Bunjevcima — ašov i motika; Bunjevačkom Žackalu — Subotica i okolina; Dr. Dragi Dimitrijeviću — isto što i Bunjevačkom Žackalu, ali sa srpskim obilježjem.

**Nikima još ni sada nije jasno šta su Bunjevci. Da li je dokazivane potrebno?**

**ODGOVOR:**

Dva prosjaka potucali su se od nemila do nedraga, te, iako je bila zima, niko nije htio da ih primi. Šta da rade, bili su prinudjeni da se zavuku na kraju sela pod jednu kamaru slame. Imali su samo jednu mrežu za hvatanje ribe, pa su se pokrili s njome. Sutradan kada su se probudili dopola smrznuti, kaže jedan drugome: „Turi prst napolje kroz mrežu i vidi da li je napolju zima?“

**Iako je već davno prečišćeno pitanje porikla Bunjevaca, ipak ima još pojedinaca, koji hoće da promine prirodan i jedino razumljiv tok stvari, te obrazuju grupe i partije, izdavaju kojekakve „organe“ dok za sobom nemaju nikoga. Zašto to oni čine?**

**EVO ODGOVORA:**

U jednom selu umro je kantor. Odbor crkvene općine sastao se da izabere novog kantora. Svi članovi bili su za to, da se izabere niki Stipe, koji je nedaleko bio čuven po svom lipom glasu. Svi su glasali na njega samo stari bać Mijo je bio protiv. Kada su ga upitali zašto je glasao protiv Stipe, kada boljeg kantora nema u cilom okolišu, bać Mijo je odgovorio: „Ja sam već stari i iznemogo, da nisam glasao protiv, niko ne bi ni znao da sam živ na ovom svitu.“

## Lazica i objektivnost

Naš Lazica u Našem Slovu nikog ne napada, već svakom priznaje da je u pravu. Da li je moguće da svi imaju pravo? Kako da ne! Moguće je i to. Evo ovako:

Bać Bašo je bio čuven po svojoj mudrosti. Iz dalekih krajeva su dolazili kod njega da ga pitaju za savit. Tako dodje jednog dana kod njega sa drugog kraja sela Bartul Prznić i potuži se na svog komšiju Vecu Kavgadžića. Bać Bašo, pošto je saslušao Bartula, reče ovom:

— Ti si sasvim u pravu, idji samo kući, vidim da je svemu kriv tvoj komšija Veco.

Nije Bartul redovno ni otišao, kad evo upadne Veco i poče da se tuži na Bartula. Bać Bašo sasluša i njega, te mu reče:

— Ti imaš pravo, idji mirno kući. Svemu je kriv Bartul.

Kad je i Veco otišao, udje u sobu bać Bartulova žena, koja je sve čula, jer se nalazila u kuhni kraj sobe, te reče bać Bartulu:

— Kako možeš da obadvojici priznaješ da su u pravu?! Ne mogu obadvojica imati pravo!

— I ti, ženo, imaš pravo, — odvrati ravno-dušno bać Bašo.

## Opet taj Dan!

Prema pisanju Dana na konferenciji Mađjara u Staroj Kanjiži Dr. Deak Leo je dokazivao bescilnost autonomističkog pokreta u Vojvodini. Naglasio je, da su vodje hrvatskog naroda u vladi već pola godine, a za to vrijeme nisu ništa učinili da bi se poblišalo stanje Mađjara.

Dakle, braćo ministri Hrvati, na posao da se ispravi sve ono što je naneseo nepravde Mađjarima za ovih 20 godina, jer nije onaj kriv, ko je te nepravde počinio, već onaj ko još nije stigao da ih ispravi. Bar to je logično! Tu već i Bunjevačko Žackalo mora da kaže svoje mišljenje i to ovako:

Stari bać Ivan bio je strašno škrt čovik. Pored toga što je jedne čakšire nosio po dvadeset godina, svoju rodbinu nije nikako pomagao. Jedne strašne zime, pošto je vidio da mu unuk Perica nema kaput, dade od svojih čakšira sašiti mu zimski kaput. Naravno Ivica još te zime podera kaput. Kad je to bać Ivan primitio počeo je da ruži: „Još nisam vidio ovako nestašno dite! Meni su čakšire dobre bile dvadeset godina, a on kaput podero za jednu zimu!“

## Razgovor na sudskom hodniku

— Šta ti tu radiš?

— Evo došao sam da uzmem uvirenje da sam bio zatvoren.

— Pa šta će ti to, za Boga miloga?

— Triba mi, hoću da kompetujem za gradskog činovnika.

## Razgovor pred Gradskom Kućom

— Jesi li čuo da su ukrali Ruffovu kasu sa 300.000 dinara?

— Čuo sam i mislim se baš o tome kako su to bili višti majstori koji su znali gdi triba ići krasti i gdi ima novaca. Vidiš gradsku kasu neće niko da ukrade.

## Dr. Aleksa i sinatorstvo

Uoči nedavnih naimenovanja za sinatore, Dr. Aleksa Ivić, kao eminentni pristavnik Srba iz ovih krajeva, očekivao je da će i on biti naimenovan za sinatora, jer i on ima skoro, ako ne i više, toliko zasluga i pristalica kao i Pajo Vujević u Somboru među Bunjevcima. On je zbog toga naredio svojim u kući kao i cijeloj užoj rodbini, da neko od njih stalno ima da dežura kraj radija, i da mu se odmah javi kad radio objavi ukaz o njegovom naimenovanju za sinatora. Dežuranje još uvijek traje, ali ukaz nikako da se potpisuje.

Šta ?

## Opet su u izgledu izbori ?

Lungulov Rada bivši Dontov poslanik na sidnici Poljoprivredne komore u Novom Sadu tražio je da se u Uredbi o ograničenju otudjivanja nekretnina izvrše neke izmene.

## MALO STATISTIKE

Subotičke Novine pod naslovom „Malo o Subotici“ između ostaloga objavile su da u Subotici ima 1042 magarca, a ukupno 16.383 marve. Mi mislimo da su Subotičke Novine pogrišile, jer taj broj je premalen, ako se uzme u obzir da u Subotici ima više od 100.000 stanovnika.

## Bunjevačko Žackalo i kandidat

U Subotici je stalno aktuelno pitanje novog gradonačelnika. Bez obzira na to ko je u datom momentu gradonačelnik, uvijek se govori o tome da će gradonačelnik biti smijenjen. Naravno da se uvijek prave i razne kombinacije u pogledu idućeg purgermajstora. To ne moramo ni napomenuti da je već svaki živi Bunjevac bio kandidat za gradonačelnički položaj. No i među kandidatima ima takvih koji se svojom ambicijom za postignuće toga položaja ističu iznad ostalih. Bunjevačko Žackalo je zbog toga, a u namiri da posluži svojim čitaocima positalo jednoga od tih kandidata i zamolilo ga da dade u pogledu svoga programa kao budući gradonačelnik izjavu.

**Bunjevačko Žackalo:** Klanjam se gospodine kandidate, molim vas za izjavu u pogledu vašeg rada. Da li imate kakav program?

**Kandidat:** Program? Pa šta sam ja bioskop da imam program?

**B. Ž.:** Ne mislim tako, već da li imate nike planove za vaš rad?

**Kandidat:** Planove mogu imati inženjeri, ali pošto ja nisam . . .

**B. Ž.:** Izvinite, ali ja sam mislio, da namiravate da izvedete kakav socijalni plan?

**Kandidat:** Šta? Socijalni? Tu rič da mi niste vište izustili. Ta nisam ja cocolišta.

**B. Ž.:** Molim onda da govorite štogod o urbanizmu . . .

**Kandidat:** E, to je već sasvim drugo. Pošto sam i sam vinogradar, to hoću da Sv. Urbanu, kao zaštitniku vinogradara, podignem lip spomenik čim dodjem na vlast.

**B. Ž.:** A šta je vaš komunalni program?

**Kandidat:** Nisam vam maloprije rekao da mi ne spominjete cocolište, a vi se još usudjujete i o komuništima da mi govorite! Ja nisam komuništa, pa nemam ni komunalni program. Ako hoćete komunalni program, a vi se obratite Staljinu! A sad možete ići! Svršilismo!

**B. Ž. (ponizno):** Zbogom.



### BEOGRAD

Ministar trgovine i industrije propisao je Uredbu o izvozu konja. Prema ovoj Uredbi izvoz konja svih vrsta može se obavljati samo na temelju izvozne potvrde, koju izdaje zavod za promicanje vanjske trgovine. Bez ove potvrde ne mogu se izvoziti konji. Magarci mogu, ali ove niko ne izvažava, iako ih ima mnogo u zemlji.

## Neke naši političari neće da se uvrde pa ma šta da se pričalo ili pisalo o njima. Zašto?

### ODGOVOR:

U jednom kartaškom društvu pored jednog igrača sidio je jedan strašno dosadan kibic. Igrač ga pokušao da ga otira po nekoliko puta, ali kibic neće nikako da ode. Najzad već i igraču prikipi, pa sav ljutit reče kibicu:

— Tornjaj se ovud, jer ću ti tako šta reći da ćeš se strašno uvriditi!

Na to će kibic:

— Slušaj, moja žena drži noćni lokal, kćerka mi je evidentirana kod policije, mog oca su prije tri godine obisili, a ja sam se nedavno vratio iz Mitrovice, gdi sam proveo 10 godina, pa šta bi ti mogao meni tako štogod reći da se uvridim!?

## Zašto oženjeni ljudi brže uspijavaju u životu od neoženjenih?

### ODGOVOR:

I zec koga gone brže trči  
od zeca koga niko ne goni.

## Metcorloški izvištaj

U Subotici duva vitar zvani Ivandekićevac, koji priti da će odneti Marka Jurča i drugove. No kako je vitar dosta slab a bač Marko težak, to nije ni čudo što je duvanje ostalo bez rezultata.

Prognoza vrmena za Suboticu i okolinu: Očekuju se još jači vetrovi popraćeni sa jakim potresima koji će pogoditi sve ono što stoji na slabim i nesolidnim temeljima.

# Šta veli naš Bodo

Faljen Isus!

Eto, dragi moj gospodaru uredniče, spremam se na veliku paradu u nedilju. Svi kažu da je ovo vrlo važna stvar za nas Bunjevce, jel od toga kako će sve ovo ispasti mlogo zavisi šta će sa nama da bidne. A i bićemo svi tamo koliko nas ima i koji smo pravi Bunjevci. Samo odmitnici neće biti tamo, al fala Bogu nji' tako malo ima da se to baš nimalo neće primititi. Mlogi još uvik kažu da mi nismo to što 'esmo. Pedig cila stvar je vrlo ednostavna. Mi uvik sami znamo da pokažemo ono što esmo. Mi

ćemo čekati i gospodara Krnjevića sa četiri konja i sotim ćemo dokazati da smo za svoj rod, a ona gospoda koja sve to ne viruju nek čekaju, pa kad i nji' budemo čekali sa četiri konja onda će to značiti da su oni u pravu, a dotle dotiče im samo četri magarca a to su sve njeve pristalice koliko ji ukupno medju Bunjevcima ima.

Čuo sam i to da su gospoda iz Sombora sa sinatorom Pajom Vujevićem u Bajmoku priredili niko Bunjevačko veče i da ji' na toj

priredbi bilo toliko da sa četiri peći nisu mogli da ugriju tu malu salu pa su morali da piju grijanog vina i da je i boca bila lipo umotana, ko što za taku veliku gospodu i priliči, u salvetu da se ne vidi šta je unutra. Pa kad se veselje završilo u boci na dnolu našli su jednog crknutog miša. Tako su ji Bajmačani lipo dočekali. Kažu da je (posli toga tek nastalo pravo veselje, tako da vaške prid tom mijanom gdi je to održano još i danas imadu šta da jidu. Iako su gospoda povraćali, ipak Bajmačani kažu za nji: „Spominjali se ali ne i povraćali!“

Kažu da će opet biti nov purgermajstor, premda ni ovaj sadašnji nije stari mogo bi se još hasnirati. Al' kažu da se niko ne prima za taj položaj, edino Dr Lujzin Ivan, al i on samo zato da se gospoja mož' vozati na grackim karucama i da posli poizbaca iz gracke kuće sve koji je ne ljube u ruke.

A sad zbogom i dovidjenja na svičanost u nedilju, pozdravlja vas

**Bunjevčić Bodo**

političar novog kova  
i majstor slova,  
bunjevački pisnik,  
lipšeg doba visnik.

**ČITAJTE I ŠIRITE JEDINI PRAVI**

**BUNJEVAČKI LIST BUNJEVAČKO ŽACKALO**

Čast i čest svakoj modi,  
Ali što se tiče elegancije  
Tu Ivić Aleksandar vodi

Manufakturna trgovina

**Ivić Aleksandra**

Strosmajerova ul.

Nema pravog salaša bez djerma  
Nit tople sobe bez sprave  
„terma“

Priporučuje se toplo svima,  
Može se dobiti kod

**FÜZI VILIMA**

SUBOTICA, Carinarska ul.

Bunjevci !

Kupujte u manufakturnoj  
trgovini

**MI. Kujundžić i Tumbas**

Jelačićeva ul

Roba prvoklasna cine  
umirene

**Oglašujte u  
Bunjevačkom  
Žackalu**

# Mali oglasi

Tražimo vište lopove koji će i u našoj kasi  
pronaći novaca. Gradsko Poglavarstvo Subo-  
tica.

★

Tražimo jednog jedinog Bunjevca, koji će  
izjaviti da nije Hrvat kako bismo mogli da  
dokažemo da Bunjevci nisu Hrvati, pošto je i  
urednik našeg lista već davno izjavio, pa čak  
i napismeno dao, da je Hrvat. Bunjevačke no-  
vine.

## SOMBOR

Na manifestacionom zboru u Somboru g.  
Djordje Cvejanov izjavio je da u Vojvodini  
uopće nema Hrvata, već samo Srba, Bunje-  
vca i Šokaca. Ovu izjavu moramo dopuniti,  
pošto je g. Cvejanov zaboravio da spomene  
Kerčane, Gaćane, Tavankučane itd. kao po-  
sebna plemena bunjevačkog naroda, a da o  
senčanskim Bunjencim i ne govorimo.

## SUBOTICA

Tolj Ivan i ing. Djurić Stipan odlučili su  
da se na idućim izborima, kandidiraju za na-  
rodne poslanike, jer spadaju medju najpo-  
pularnije ličnosti u Subotici. Na izborima za  
gradske činovnike na koncu je visilo što  
obojica nisu dobili po jedan glas.

## Poruka uredništva :

Molimo sva naša lica, koja ne žele pri-  
mati list da nam ga vrate, jer ćemo ih u  
psotivnom slučaju smatrati za pridplatnike,  
pa ćemo im list i nadalje slati.

Vlasnik i urednik *Grge Prčić*, Agina ul. 7. Rukopisi se ne vraćaju. List izlazi svakih 15 dana.  
Pojedini broj stoji 2 dinara. Polugodišnja pretplata 20 din., godišnja 40 din. — Štampano  
u štampariji *Bratce Pišore*, Subotica, I. Šeraga ul. 12. Telefon 629.